



საქართველოს მთავრობის გ ა ნ კ ა რ ბ უ ლ ე ბ ა

N1318 2025 წლის 12 აგვისტო ქ. თბილისი

2025 წლის ვაშლის მოსავლის რეალიზაციის ხელშეწყობის ღონისძიებების შესახებ

1. საქართველოს გარემოს დაცვისა და სოფლის მეურნეობის სამინისტრომ უზრუნველყოს „საქართველოს 2025 წლის სახელმწიფო ბიუჯეტის შესახებ“ საქართველოს კანონით საქართველოს გარემოს დაცვისა და სოფლის მეურნეობის სამინისტროსთვის გამოყოფილი ასიგნებების ფარგლებში არაუმეტეს 5 000 000 (ხუთი მილიონი) ლარის მოძიება და მიმართვა „არასტანდარტული ვაშლის მოსავლის რეალიზაციის ხელშეწყობის პროგრამის“ დასაფინანსებლად.

2. ა(ა)იპ – სოფლის განვითარების სააგენტომ (შემდგომში – სააგენტო), მეხილეობის სფეროში დასაქმებული ფიზიკური პირების მიერ მიღებული არასტანდარტული ვაშლის მოსავლის რეალიზაციის ღონისძიებების ხელშეწყობის მიზნით, არასტანდარტული ვაშლის გადამამუშავებელ კომპანიებზე (შემდგომში – კომპანია), რომლებიც 2025 წლის 15 დეკემბრამდე 1 კგ არასტანდარტულ ვაშლს შეისყიდიან არანაკლებ 0.27 ლარად, გასცეს სუბსიდია 1 კგ არასტანდარტულ ვაშლზე 0.10 ლარის ოდენობით.

3. სააგენტომ, 2025 წლის ვაშლის მოსავლის რეალიზაციის ხელშეწყობის ღონისძიებების შეუფერხებლად განხორციელების მიზნით, შექმნას სამუშაო ჯგუფი (შემდგომში – საკოორდინაციო შტაბი) საქართველოს გარემოს დაცვისა და სოფლის მეურნეობის სამინისტროს წარმომადგენელთა მონაწილეობით და შემჭიდროებულ ვადებში უზრუნველყოს საკოორდინაციო შტაბის შესაბამისი საოფისე ინვენტარით/საქონლით და კომპიუტერული ტექნიკით აღჭურვა, „არასტანდარტული ვაშლის მოსავლის რეალიზაციის ხელშეწყობის პროგრამით“ გათვალისწინებული ასიგნებების ფარგლებში.

4. სააგენტომ კომპანიებზე სუბსიდიის თანხა გასცეს უნაღდო ანგარიშსწორებით, ამ განკარგულების მე-2 პუნქტში მითითებული საფასურის გადახდის დამადასტურებელი დოკუმენტისა და შესაბამისი უფლებამოსილი პირების (საქართველოს გარემოს დაცვისა და სოფლის მეურნეობის სამინისტრო/სააგენტო, ჩამბარებელი პირი და კომპანია) მიერ ვაშლის შესყიდვის თაობაზე გაფორმებული მიღება-ჩაბარების აქტის სააგენტოსთვის წარდგენიდან არაუგვიანეს 15 სამუშაო დღის ვადაში.

5. დაევალოს საქართველოს შინაგან საქმეთა სამინისტროს, ვაშლის მოსავლის რეალიზაციის ხელშეწყობის ღონისძიებების მიმდინარეობისას, უზრუნველყოს ვაშლის ჩაბარების პროცესზე კონტროლი, წესრიგის დაცვა და უსაფრთხოება.

6. კომპანიები, რომლებსაც 2025 წლის განმავლობაში განზრახული აქვთ ვაშლის მიღება-გადამუშავება, ვალდებული არიან:

ა) გაიარონ რეგისტრაცია, სააგენტოს მიერ დამტკიცებული პროცედურის შესაბამისად;

ბ) უზრუნველყონ კომპანიები არანაკლებ 10 მზ/წმ სიჩქარის ინტერნეტით, ასევე საკოორდინაციო შტაბის მიერ განსაზღვრული მონაცემების შესაბამისად – პერსონალური კომპიუტერით/ნოუთბუქით და კომბინირებული პრინტერით;

გ) ვაშლის მიღების პროცესი (აწონვა) განახორციელონ მხოლოდ ელექტრონული სასწორის საშუალებით;

დ) უზრუნველყონ ვაშლის მიმღები საწარმოს შიდა და გარე პერიმეტრის ვიდეოკონტროლის სისტემით აღჭურვა (არანაკლებ 4 ვიდეოკამერისა, ინტერნეტის სიჩქარე = 1 მბ/წმ-ს კამერების რაოდენობაზე, სტატიკური გარე IP მისამართი, მონიტორინგის ცენტრიდან ჩამწერამდე წვდომების გახსნა, ვიდეოჩამწერის მომხმარებელი კამერებზე ადმინისტრირების უფლებით, ვიდეოჩამწერი თავსებადი მონიტორინგის პროგრამასთან iVMS-4200 (ვერსია 3.3.0.4 ან მეტი), კამერა არანაკლებ 3 მეგაპიქსელი ღამის ხედვის ფუნქციით, ვაშლის მიღებისა და გადამუშავების პროცესის სრული ჩანაწერი (არქივის შენახვა 2026 წლის 30 აპრილამდე)), რომლის საშუალებით განხორციელდება ვაშლის მიღება-ჩაბარებისა და გადამუშავების პროცესის კონტროლი.

7. ამ განკარგულების მე-2 პუნქტში მითითებული სუბსიდიის მიღების უფლება აქვს მხოლოდ იმ კომპანიას, რომელსაც დაცული აქვს ამავე განკარგულების მე-6 პუნქტით გათვალისწინებული პირობები და რომელიც:

ა) ვაშლის მიღება-გადამუშავების პროცესის დაწყებამდე სააგენტოსთან გააფორმებს ხელშეკრულებას (შემდგომში – ხელშეკრულება);

ბ) შესყიდული 1 კგ ვაშლის სანაცვლოდ ჩამბარებელს გადაუხდის არანაკლებ 0.27 ლარს;

გ) 2025 წლის 25 დეკემბრამდე სააგენტოს წარუდგენს:

გ.ა) ვაშლის ჩაბარების თაობაზე ვაშლის ჩამბარებელსა და კომპანიას შორის გაფორმებულ მიღება-ჩაბარების აქტს, რომელსაც ხელს აწერენ საქართველოს გარემოს დაცვისა და სოფლის მეურნეობის სამინისტროს/სააგენტოს, კომპანიის უფლებამოსილი წარმომადგენლები და ვაშლის ჩამბარებელი;

გ.ბ) ვაშლის ჩამბარებლისთვის/ჩამბარებლებისთვის 1 კგ ვაშლის შესყიდვის სანაცვლოდ არანაკლებ 0.27 ლარის გადახდის დამადასტურებელ დოკუმენტაციას;

გ.გ) ვაშლის მიღება-ჩაბარებისა და გადამუშავების პროცესის სრულ ვიდეოჩანაწერს იმ პერიოდზე, რომელზეც მოთხოვნილი იქნება სუბსიდია.

8. კომპანიაზე ამ განკარგულების მე-2 პუნქტში მითითებული სუბსიდია გაიცემა ამავე განკარგულების მე-7 პუნქტით გათვალისწინებული დოკუმენტაციისა და ვაშლის მიღება-ჩაბარებისა და გადამუშავების პროცესის სრული ვიდეოჩანაწერის სააგენტოში წარდგენიდან 15 სამუშაო დღის ვადაში.

9. სააგენტომ უზრუნველყოს კომპანიებისგან წარდგენილი ვაშლის მიღება-ჩაბარებისა და გადამუშავების პროცესის სრული ვიდეოჩანაწერ(ებ)ის შენახვა 2026 წლის 31 მაისამდე.

10. კომპანია ვალდებულია, უზრუნველყოს ვაშლის ყოველდღიური მიღების განზრახვის შესახებ ინფორმაციის მიწოდება საკოორდინაციო შტაბისათვის.

11. „საქართველოს 2025 წლის სახელმწიფო ბიუჯეტის შესახებ“ საქართველოს კანონის 25-ე მუხლის მე-2 და მე-3 პუნქტების შესაბამისად, სააგენტოზე არ გავრცელდეს „საქართველოს 2025 წლის სახელმწიფო ბიუჯეტის შესახებ“ საქართველოს კანონის 25-ე მუხლის მე-3 პუნქტით გათვალისწინებული შეზღუდვა და მიეცეს თანხმობა, 2025 წლის ვაშლის მოსავლის რეალიზაციის ხელშეწყობის ღონისძიებების შეუფერხებლად განხორციელების მიზნით, არამუდმივი ამოცანების შესასრულებლად შრომითი ხელშეკრულებით დასაქმებულ პირთა რაოდენობა განისაზღვროს არაუმეტეს 45 ერთეულით, რომელთა შრომის ანაზღაურება დაფინანსდება „არასტანდარტული ვაშლის მოსავლის რეალიზაციის ხელშეწყობის პროგრამის“ (პროგრამული კოდი: 31 05 21) ფარგლებში.

პრემიერ-მინისტრი



ირაკლი კობახიძე